

REGIONAL NEWS

HEADLINES:-

1. Tourism Minister Pi Lalrinpuiin vawiin khan 'Tourism Awareness Week 2024' chu Aizawl ah a hawng.
2. Assembly Speaker Pu Biakzaman Tamdil a Contour Hedgerow Farming Programme a hmanpui a, mi 106 te hnenah tanpuina hlan a ni.
3. Vawiin khan Prime Minister Narendra Modia kaihhruaiin NITI Ayog Governing Council Meeting vawi 9-na chu New Delhi ah neih a ni.
4. Prime Minister Narendra Modia chuan naktuk chawhma dar 11-ah Mann Ki Baat programme a hmang leh dawn.

<><><>

TOURISM

Tourism Minister Pi Lalrinpuiin vawiin khan 'Tourism Awareness Week 2024' chu Aizawl Millenium Centre kawtah a hawng. Vawiin July ni 27 atanga August ni 3 chhunga Tourism Awareness Week hman chung hian Tourism Department chuan "Tourism for All" tih thupuih hmangin tourism chungchang inzirtirna te, khaw thlan bik te tan intihsiakna leh talk show hmang te a inhrilhriatna te'n hun an hmang dawn a ni.

Pi Lalrinpuii chuan Mizoram chhunga tourism tihmasawn tur chuan a chhunga cheng mipuite an pawimawh a ti a. Tourism hmasawn theihna tam tak a la awm thu te, tourism chungchanga rilru puthmang leh a dawnsawn danah pawh hmasawn tlan a pawimawh a tih thu te a sawi. Tourism Minister chuan India ram chu kawvela mihring tamna ber a nih thu leh, hemi avang hian tourism ngaihtuah hian ram pawn ami kher beisei lovin, ram chung mi atang ringawt pawhin tourist thahnem tak Mizoramin a hmuh theih thu leh, a lo hmuh tawh thin thu a sawi.

Tourism Department Secretary Dr. Lalrozama chuan thu sawi bawkin, khualzinte an duat chuan Mizoram nawm zia zau zawkin an puan darh sak zel dawn a ni, a ti a. Tourism tihmasawn turin sorkar leh department in theihtawp a chhuah thu a sawi a, hetihrial hian fimkhur tak chungin ke penin, ram thenkhatah chuan khualzin tam lutuk avanga harsatna an tawh te hre chungin tlin tawk ang zelin hma lak a tul thu a sawi a. Tourism chuan ram tan tangkaina a thlen zel a beisei thu leh, chumi tihlawhtling tur chuan department in theihtawp a chhuah zui zel tur thu a sawi.

Tourism Awareness Week neih chung hian local cable TV hrang hrangah te Talkshow neih a ni ang a. Rural Tourism Workshop buatsaihin Tourism Village Competition te neih ani bawk ang a. He intihsiaknaah hian khaw thlan bik pariat - Sailam, Biate, Sairang, Sangau, Aibawk, Baktawng, Buangpui leh Ralvawng an awm a ni. Heng bakah hian Mizoram pumpuih tourism chungchanga mipuite hriat tur pawimawh inziahna Pamphlet sem a ni dawn bawk a. Zingkawng khaw kar leh Tourism hmun hrang hrangah Hoarding tar tum a ni bawk.

<><><>

LADC

Lai Autonomous Disatrick Council a ZPM MDC pahnihten MDC an nihna hlihsak an nihlohna chhan tur sawifiah tura LADC Chairman in a hriattirna chu High Court chuan kaldan pangngai a kal turin thutlukna a siam.

LADC a MDC pakua te chu June 20 khan ZPM ah lawmluh an ni a, heng zinga pahnih chu Independent MDC an ni a, heng Independent MDC pahnih Pu LR Dingliana Chinzah leh Pu N.Zangura te chu LADC Chairman Pu V.L.Hmuaka chuan July 12 khan LADC dan dinglai angin Political Party an zawm vanga MDC an nihna hlihsak an nihlohna chhantur sawifiah tura hriattirna pein July 18 thleng insawifiahna hun a pe a, MDC pahnihte hian hunbitiam chungin an chhang a.

Lawngtlai AOC Veng bialtu MDC Pu L.R.Dingliana Chinzah chuan Lawngtlai a Akashvani corr a hrilhdanin Show Cause Notice an hmuh hnu ah High Court lam ah an zualko a, Gauhati High Court , Aizawl Bench chuan an zualkona chu ngaihtuah nghalin, MDC an nihna hlihsak leh hlihsakloh chungchangah LADC chu hmalalo va, tuna an awmdan pangngai a awmturin a ti.

Hemi hmalam hian MNF, MDC Pu K. Hre Kung chuan ZPM a lo zawm tawh a, Gauhati High Court Aizawl Bench ah zualkovin, Court chuan tuna Independent MDC pahnihte chungchanga thu a dah ang tho hian a lo dah tawh bawk.

<><><>

SPEAKER

Assembly Speaker Pu Lalbiakzama chuan Tamdil a Contour Hedgerow Farming Programme a hmanpui a, he hunah hian Contour Hedgerow Farming hnuai mi 106 te hnenah tanpuina hlan a ni.

Pu Biakzama chuan Mizoram chu tlang ram a nih avangin leilung a luangral chak a, lei tha a inchhekkhawm leh har avangin khawvel hmun dang ram rem leh phaizawlte aiin a let tam takin humhalh a hautak zawk a ni ti a, Contour Hedgerow Farming ah lei tha kal ral lo thei ang ber a leilung hman tlangkai leh chu chu mihring leh nungcha te damkhawchhuah na tur atana tih makmawh a ni tih sawiin mihringte nunna atan chaw thar chhuahna turin leilung chu mamawh a ni a ti bawk.

Leilung kalral tam lo leh hlawk si a thlai thar dan leh ram leilung pianhmang mil tur Forest Dept ten an hmang tlangkai thiam chu fakawm a ti a, Ramngaw leh lei chunglang hang tha te humhalh tur hian Dept. tha chakna ringawt a tawk zolova, mi zawng zawng an pawimawh a ni a ti. A bik takina huan lo ram neitute pawimawh zia sawiin 'Integrated Management Plan of Tamdil Wetlands' hnuai a thlan tawh chhungkaw 318 leh la thlan tur te, a vaiin chhungkaw 530 te'n a nihna ang taka an kalpui chuan leilung humhalh leh thlai thar hlawk kawngah saitual leh a chhehvel nghawng dawt tham a ni dawn a ti.

Tamdil Wetland Monitoring Committee hnuai hian Saitual, Sihfa, Tualbung leh dilkhan khuate awmin an ni hian balhla leh lakhuihthei an ching a ni. Hei bakah hian Tamdil Integrated Management Plan hnuai hian Farm based & Skill based Microenterprises atangin chhungkaw 150 in tanpuina an dawng tawh bawk

<><><>

LUNGLEI

Vaiin chhun khan National Highway No.302 siamthat meka Lunglei leh Hauruang inkar chu Lunglei YMA Sub-Headquarters Office Bearer thenkhat bakah YMA Sub-Headquarters-a Vigilance & Monitoring Committee te, Hauruang Branch YMA Office Bearer thenkhat te'n a hmunah kalin an enfiah.

Lunglei leh Hauruang inkarah hian kawng chhe zual lai engemawzat a awm avangin a bik takin Hauruang atanga mahni In atanga lehlanga Lunglei-a school leh college a kal zirilaite'n harsatna an tawk nasa hle tih thawm a awm avangin YMA Sub-Headquarters hruaitute, YMA Headquarters-a Vigilance & Monitoring Committee member-te leh Hauruang Branch YMA hruaitute hian helai kawng siamtu contractor BRN Infrastructure Pvt Ltd-a an hotute chu ko-in; an kawng siam mek hi a hmunah en enpui a. Kawng chhe zual lai te chu a rang thei ang bera siamtha tura ngenin; contractor BRN Infrastructure Pvt Ltd- te pawh hian naktuk atangin kawng chhe zual lai te hi an lo siamthat tur thu YMA hruaitute hi an lo hrilh a ni.

Kawngchhe lai siamthat hna thawh hi YMA chuan a vil zui reng dawn tih an sawi.

<><><>

SOCIAL WELFARE MINISTER

Social Welfare & Tribal Affairs Minister Pi Lalrinpui chuan Mizoram mihring tlemte zingah naupang tam tak, rahbi tleu leh humsual dai an tam lutuk chu a pawh a tih thu a sawi.

He thu hi nimina Durtlanga Home hrang hrang a tlawhnaah Minister hian a sawi a. Minister chuan pianphung tha vek, awm dan dik loh vanga khawtlang leh chhungte a harsatna siamtu an nih thin chu kalsan a, tisual leh ngai miah loh tura rilru siam turin a chah a ni.

Health Minister in home a tlawh te hi - Ferrando Integrated Women Development Centre (Peace Home), One Stop Centre, Bethsaida Home, Observation Home, Special Home, Daffodils Haven leh Observation cum Special Home for Girls te a ni a. Home a awm mek naupangte chu Minister hian kawmin home-in harsatna an tawh hrang hrangte a ngaihthlaksak a. Naupangte hian an thiamthil Minister hi an lo entir a. An mamawh leina atan Minister hian pawisafai a hlan bawk a ni.

Peace Home-ah hian naupang 26 leh hmeichhe humsual dai 7 enkawl mek an ni a. Domestic Workers Training Programme kalpui mek niin Missionary Sisters of Mary Help of Christian (MSMHC) te'n Ferrando Development Centre (Peace Home) hi an enkawl mek a ni.

Hmeichhe baihvaite tlukluh lailawkna One Stop Centre tun thleng hian hmeichhia harsatna neih avanga tlulut mi 399 an awm tawh a. Thawktu mi 12 an awm mek a. Bethsaida home chu chuan naupang kum 18 hnuailam pianphunga harsatna nei, mipa leh hmeichhia awmna a ni a. Naupang 19 enkawl lai awmin thawktu 18 an awm mek a. Naupang awmte hi Cerebral Palsy (thluak zeng) avanga pianphunga harsatna nei an ni tlangpui a ni.

Observation Home hi naupang case nei dahna hmun niin naupang pakua an awm mek a, Special Home hi naupang siam thatna hmun rehabilitation centre niin kum thum thleng an awm thei a, tunah hian naupang 20 an awm mek a thung a. Daffodils Haven hi mipa naupang kum 16 leh 18 inkar sual lian tham deuh khawih te dahna a ni a. Tunah hian naupang mipa 6 an awm mek a, Hmeichhe naupang case nei te dahna Observation Cum Special Home for Girls ah hian hmeichhia 7 an awm mek bawk a ni.

<><><>

MAMIT

Mamit SP Pi Lalhangpuii Pulamte leh Mamit District MJA te chuan Mamit District chhunga Assam ramri 2, Thinghlun leh Kolalian Border Outpost-te an tlawh a.

Border outpost a awm sipaite leh khawtlang hruaitute chuan tha taka lo dawngsawngin report hrang hrang ngaihthlak a ni, he hunah hian Khawtlang leh Kohhran hruaitute nen inkawmin, Border outpost-a awm khawtlang hruaitute nen hian thawhhona tha tak hnuai hmalak thin a ni a, ramri atanga ruihhlo leh a kaihhnawih hrang hrang luhna khan remchang tak a nih avangin khawtlang ang leh Police-te nen tanrual a ngaihthu sawiho a ni a, Outpost a awm Police-te pawh ruihhlo laka fihlim mi an nih ngei a ngaihthu sawilan tel a ni bawk.

Thinghlun border outpost ah hian 4th IR Bn awmin, Kolalian ah hian 3rd Bn, MAP an awm thung a, tun dinhmunah heng border outpost ah te hian harsatna lian tham sawi tur a awm rih lo a ni.

<><><>

PM MANN KI BAAT

Prime Minister Narendra Modia chuan tun Pathianni chawhma dar 11 khian Akashvani kaltlangin mipuite hnena thu a sawina Mann Ki Baat programme a hmang leh dawn a. Mizo tawnga lehlinin a zui ang. Tun tum ami hi episode 112-na tur a ni.

Akashvani leh Doordarshan, AIR News website leh newsonair mobile app ah te ngaihthlak theih a ni ang a. AIR News, DD News, PMO leh Information and Broadcasting Ministry Youtube channel ah te livestream a ni ang.

<><><>

PARIS OLYMPIC

Nizan khan Paris Olympic 2024 chu ropui taka hawn a ni a. Paris khawpuia River Seine kiangah hawnna hun hman a ni a. Ram hrang hrang atangin infiammi te an fuankhawm a. India aiawhte pawh he hunah hian telin PV Sindhu leh Achanta Sharath Kamal te chuan hnam puanzar kengin hma an hruai a ni. Vawiin hian inelna hmasa berah 10m air rifle mixed team leh 10m air pistol mipa leh hmeichhiaah India infiammite an inlan ang.

<><><>